



KEMENTERIAN WILAYAH PERSEKUTUAN

Aras G-7, Blok 2, Menara Seri Wilayah, Presint 2, 62100 Putrajaya

Tel: 03-8889 7888 Faks: 03-8889 7957

Laman web: www.kwp.gov.my

SIARAN MEDIA

UNTUK LIPUTAN MEDIA MASSA

WARGA PPR PEKAN BATU MERIAHKAN SAMBUTAN HARI WILAYAH PERSEKUTUAN 2016

KUALA LUMPUR, 28 Februari 2016 – Kenduri 1Wilayah Persekutuan (1WP) Peringkat Parlimen Batu yang diadakan di PPR Pekan Batu 4 1/2, Jalan Ipoh KL dihadiri kira-kira 2500 orang warga kota, Kuala Lumpur. Program ini disempurnakan oleh YB Datuk Seri Utama Tengku Adnan Bin Tengku Mansor, Menteri Wilayah Persekutuan.

2. Program ini bertujuan untuk mengeratkan silaturahim antara komuniti khususnya di kawasan PPR Pekan Batu dan penduduk sekitarnya, Kuala Lumpur selain dapat bekerjasama dalam melaksanakan aktiviti kemasyarakatan seperti aktiviti gotong-royong kebersihan dan sesi memasak secara beramai-ramai. Selain itu, menerusi kenduri 1WP ini juga turut menjadi medium bagi memperkukuhkan persefahaman, perpaduan dan ukhuwah sesama warga kota bagi menjamin keharmonian.

3. Bersempena dengan program Kenduri 1Wilayah Persekutuan turut diadakan aktiviti Gotong-Royong Kebersihan dan Cegah Denggi bersama komuniti bertujuan membangkitkan kesedaran masyarakat akan bahaya ancaman penyakit denggi yang disebabkan oleh nyamuk aedes. Longkang-longkang di sekitar kawasan PPR Pekan Batu dibersihkan dan dicuci bagi menghapuskan tempat pembiakan nyamuk aedes dengan kerjasama pihak DBKL.

4. Pelbagai aktiviti turut dijalankan sepanjang program berlangsung seperti gotong-royong kebersihan, sukaneka, futsal, pertandingan mewarna, pertandingan karaoke, senamrobik, gerai pameran oleh agensi kerajaan dan juga badan korporat, persembahan kebudayaan, cabutan bertuah dan juga gotong-royong memasak juadah kenduri oleh warga PPR Pekan Batu. Melalui konsep gotong-royong yang diterapkan dalam program Kenduri 1WP ini, warga Wilayah Persekutuan berpeluang untuk merasai kemeriahan suasana kenduri sambil menjamu selera dengan juadah yang dimasak sendiri secara beramai-ramai. Malahan konsep gotong-royong ini juga dapat memeriahkan dan menceriakan lagi warga kota pelbagai peringkat umur. Dengan amalan ini, ianya bukan sahaja dapat menjimatkan kos dan masa tetapi mengeratkan perpaduan sesama masyarakat setempat.

5. Diharapkan melalui program yang bermanfaat ini, warga Wilayah Persekutuan pelbagai peringkat dan latar belakang dapat mengukuhkan hubungan akrab, meningkatkan semangat kebersamaan dan kekitaan antara satu sama lain bagi membentuk masyarakat yang sejahtera dan ceria. Program sambutan Hari Wilayah Persekutuan 2016 ini juga dapat menyuntik semangat sayang dan rasa cinta kepada Wilayah Persekutuan dalam usaha memastikan keharmonian serta perpaduan warga Wilayah Persekutuan terus dikekalkan bagi kebaikan dan kesejahteraan bersama.

Disediakan Oleh:

Bahagian Komunikasi Korporat
Kementerian Wilayah Persekutuan
Kuala Lumpur
28 Februari 2016